

**FRAMKVÆMDARÁKVÖRÐUN FRAMKVÆMDASTJÓRNARINNAR
(ESB) 2021/1482****2021/EES/80/22****frá 14. september 2021**

um að koma á jafngildi COVID-19-vottorða sem gefin eru út í Ísrael og vottorða sem gefin eru út í samræmi við reglugerð Evrópuþingsins og ráðsins (ESB) 2021/953 til þess að greiða fyrir réttinum til frjálsrar farar innan Sambandsins (*)

FRAMKVÆMDASTJÓRN EVRÓPUSAMBANDSINS HEFUR,

með hliðsjón af sáttmálanum um starfshætti Evrópusambandsins,

með hliðsjón af reglugerð Evrópuþingsins og ráðsins (ESB) 2021/953 frá 14. júní 2021 um ramma um útgáfu, sannprófun og viðurkenningu samvirkandi COVID-19-vottorða um bólusetningu, próf og bata (stafrænt ESB-vottorð vegna COVID) til að auðvelda frjálsa för á meðan COVID-19-heimsfaraldurinn stendur yfir ⁽¹⁾, einkum 2. mgr. 8. gr.,

og að teknu tilliti til eftirfarandi:

- 1) Í reglugerð (ESB) 2021/953 er mælt fyrir um ramma um útgáfu, sannprófun og viðurkenningu samvirkandi COVID-19-vottorða um bólusetningu, próf og bata (hér á eftir nefnt „stafrænt ESB-vottorð vegna COVID“) í því skyni að auðvelda handhöfum þeirra að nýta sér rétt sinn til frjálsrar farar á meðan COVID-19-heimsfaraldurinn stendur yfir. Hún á einnig að stuðla að því að auðvelda afléttingu í áföngum á takmörkunum á frjálsri för, sem aðildarríkin hafa sett í samræmi við lög Sambandsins til að hefta útbreiðslu SARS-CoV-2, með samræmdum hætti.
- 2) Reglugerð (ESB) 2021/953 heimilar viðurkenningu COVID-19-vottorða, sem þriðju lönd gefa út til handa borgurum Sambandsins og aðstandendum þeirra, ef framkvæmdastjórnin kemst að þeirri niðurstöðu að umrædd COVID-19-vottorð séu gefin út í samræmi við staðla sem jafngilda þeim sem komið er á fót samkvæmt þeirri reglugerð. Enn fremur verða aðildarríkin, í samræmi við reglugerð Evrópuþingsins og ráðsins (ESB) 2021/954 ⁽²⁾, að beita þeim reglum sem mælt er fyrir um í reglugerð (ESB) 2021/953 gagnvart ríkisborgurum þriðju landa sem falla ekki undir gildissvið þeirrar reglugerðar en dvelja eða eru búsettir löglega á yfirráðasvæði þeirra og hafa rétt til að ferðast til annarra aðildarríkja í samræmi við lög Sambandsins. Af þeim sökum ættu sérhverjar niðurstöður um jafngildi sem mælt er fyrir um í þessari ákvörðun að eiga við um COVID-19-vottorð um bólusetningu og bata sem gefin eru út í Ísrael til handa ríkisborgurum Sambandsins og aðstandendum þeirra. Á sama hátt ættu slíkar niðurstöður um jafngildi á grundvelli reglugerðar (ESB) 2021/954 einnig að eiga við um COVID-19-vottorð um bólusetningu og bata sem gefin eru út í Ísrael til handa ríkisborgurum þriðju landa, sem dvelja eða búa löglega á yfirráðasvæði aðildarríkjanna, með þeim skilyrðum sem mælt er fyrir um í þeirri reglugerð.
- 3) Hinn 19. júlí 2021 lét Ísrael framkvæmdastjórninni í té ítarlegar upplýsingar um útgáfu samvirkandi COVID-19-vottorða um bólusetningu og bata innan kerfis sem ber heitið „Ramzor-kerfið“. Ísrael upplýsti framkvæmdastjórnina um að það liti svo á að COVID-19-vottorð þess væru gefin út í samræmi við staðal og tæknikerfi sem eru samvirkandi við traustrammann sem komið er á fót með reglugerð (ESB) 2021/953 og gera kleift að sannprófa ósvikni, gildi og heilleika vottorðanna. Ísrael hefur í þessu tilliti upplýst framkvæmdastjórnina um að COVID-19-vottorð, sem Ísrael hefur gefið út í samræmi við „Ramzor-kerfið“, innihaldi þau gögn sem fram koma í viðaukanum við reglugerð (ESB) 2021/953.
- 4) Hinn 6. september 2021 lét framkvæmdastjórnin, í kjölfar beiðni frá Ísrael, gera tæknipróf sem sýndu fram á að COVID-19-vottorðin um bólusetningu og bata eru gefin út af Ísrael í samræmi við kerfi sem ber heitið „Ramzor-kerfið“ sem er samvirkandi við traustrammann sem komið er á fót með reglugerð (ESB) 2021/953 og gerir kleift að sannprófa ósvikni, gildi og heilleika vottorðanna. Framkvæmdastjórnin staðfesti einnig að COVID-19-vottorðin um bólusetningu og bata, sem Ísrael hefur gefið út í samræmi við „Ramzor-kerfið“, innihaldi nauðsynleg gögn.

(*) Þessi ESB-gerð birtist í Stjttíð. ESB L 325, 15.9.2021, bls. 51. Hennar var getið í ákvörðun sameiginlegu EES-nefndarinnar nr. 298/2021 frá 29. október 2021 um breytingu á V. viðauka (Frelsi launþega til flutninga) og VIII. viðauki (Staðfesturættur) við EES-samninginn (bíður birtingar).

(1) Stjttíð. ESB L 211, 15.6.2021, bls. 1.

(2) Reglugerð Evrópuþingsins og ráðsins (ESB) 2021/954 frá 14. júní 2021 um ramma um útgáfu, sannprófun og viðurkenningu samvirkandi COVID-19-vottorða um bólusetningu, próf og bata (stafrænt ESB-vottorð vegna COVID) vegna ríkisborgara þriðju landa sem dvelja eða búa löglega á yfirráðasvæðum aðildarríkjanna á meðan COVID-19-heimsfaraldurinn stendur yfir (Stjttíð. ESB L 211, 15.6.2021, bls. 24).

- 5) Auk þessa upplýsti Ísrael framkvæmdastjórnina um að það gefi út samvirkandi bólusetningavottorð fyrir COVID-19-bóluefni. Þau eru nú Comirnaty og Spikevax.
- 6) Enn fremur upplýsti Ísrael framkvæmdastjórnina um að það gefi út samvirkandi vottorð um bata. Þessi vottorð gilda í allt að 180 daga frá fyrstu jákvæðu prófniðurstöðu.
- 7) Ísrael upplýsti framkvæmdastjórnina einnig um að það viðurkenni vottorð um bólusetningu, próf og bata sem aðildarríkin og EES-löndin gefa út í samræmi við reglugerð (ESB) 2021/953.
- 8) Ísrael upplýsti framkvæmdastjórnina einnig um að það viðurkenni bólusetningavottorð og falli frá ferðatakörkunum að því er varðar þá sem hafa verið bólusettir með bóluefnum sem fengið hafa markaðsleyfi alls staðar í ESB samkvæmt reglugerð (EB) nr. 726/2004.
- 9) Ísrael upplýsti framkvæmdastjórnina enn fremur um að það viðurkenni vottorð um kjarnsýrumögnunarpróf (NAAT-próf) vegna COVID-19 (t.d. víxlritakjarnsýrumögnun, RT-PCR) sem aðildarríkin og EES-löndin gefa út. Ísrael bendir þó á að allir ferðamenn, þ.m.t. þeir sem hafa undir höndum prófniðurstöður frá sínu svæði, verði að endurtaka NAAT-próf (t.d. RT-PCR) við lendingu, og að ekki sé fallið frá neinum ferðatakörkunum í ljósi niðurstaðna prófs sem gengist er undir fyrirflug nema að heimila að farið sé um borð. Enn fremur viðurkennir Ísrael ekki skyndipróf.
- 10) Enn fremur upplýsti Ísrael framkvæmdastjórnina um að þegar sannprófendur í Ísrael sannprófa vottorð verði persónuupplýsingar, sem fram koma í þeim, aðeins unnar til að sannprófa og staðfesta bólusetningu, prófniðurstöðu eða bata handhafa og verði ekki geymdar eftir það.
- 11) Þannig eru til staðar nauðsynlegir þættir til að ákveða að líta skuli á COVID-19-vottorð, sem eru gefin út í Ísrael í samræmi við „Ramzor-kerfið“, sem jafngild þeim sem gefin eru út í samræmi við reglugerð (ESB) 2021/953.
- 12) Því ætti að viðurkenna COVID-19 vottorð, sem gefin eru út af Ísrael í samræmi við „Ramzor-kerfið“, með þeim skilyrðum sem um getur í 5. mgr. 5. gr. og 8. mgr. 7. gr. reglugerðar (ESB) 2021/953.
- 13) Til að þessi ákvörðun öðlist gildi ætti að tengja Ísrael við traustamma stafræna ESB-vottorðsins vegna COVID sem komið var á fót með reglugerð (ESB) 2021/953.
- 14) Til að vernda hagsmuni Sambandsins, einkum á sviði lýðheilsu, er framkvæmdastjórninni heimilt að beita heimildum sínum til að fella þessa ákvörðun tímabundið eða varanlega úr gildi ef skilyrði 2. mgr. 8. gr. reglugerðar (ESB) 2021/953 eru ekki lengur uppfyllt.
- 15) Í ljósi þess að nauðsynlegt er að tengja Ísrael við traustamma stafræna ESB-vottorðsins vegna COVID, sem komið var á fót með reglugerð (ESB) 2021/953, eins fljótt og unnt er ætti þessi ákvörðun að öðlast gildi daginn sem hún birtist í *Stjórnartíðindum Evrópusambandsins*.
- 16) Ráðstafanirnar, sem kveðið er á um í þessari ákvörðun, eru í samræmi við álit nefndarinnar sem komið er á fót með 14. gr. reglugerðar (ESB) 2021/953.

SAMÞYKKT ÁKVÖRDUN ÞESSA:

1. gr.

Líta ætti á COVID-19-vottorð um bólusetningu og bata, sem Ísrael gefur út í samræmi við „Ramzor-kerfið“, sem jafngild þeim sem gefin eru út í samræmi við reglugerð (ESB) 2021/953 til þess að greiða fyrir réttinum til frjálsrar farfar innan Sambandsins.

2. gr.

Tengja skal Ísrael við traustamma stafræna ESB-vottorðsins vegna COVID sem komið var á fót með reglugerð (ESB) 2021/953.

3. gr.

Ákvörðun þessi öðlast gildi daginn sem hún birtist í *Stjórnartíðindum Evrópusambandsins*.

Gjört í Brussel 14. september 2021.

Fyrir hönd framkvæmdastjórnarinnar,

Ursula VON DER LEYEN

forseti.
